



Un cuintrisens! E jere cheste la peraule miôr par descrivi Tavo, vecjut insopuartabil e rognôs che ogni biade sere al paronave i discors su lis bancjutis de ostarie.

«I neris jo no ju sopuarti! Ma propite no ju sopuarti!» e jere la frase che par solit, fra un catâr e un altri, e deve il via ai siei bruntulaments. Di li in poi, ogni cjativerie e jere buine pe categorie. Anzit... al rivave a mudâ la stesse categorie intune cjativerie.

E cussì, mo un mo chel altri, dut il paîs al jere stât piturât di chel colôr.

Cui che al lavorave mâl, *come i neris*, cui che al lavorave masse, *come i neris*, fintremai cui che al jere un dorondon, o un peteçon, o pucefadiis, o dordul, o masse furbo, o al steve dibant, o al jere çondar, o scjars... e simpri, par scugnî, ogni volte, ducj, *come i neris!*

E no stait a saltâmi sù cu la naine che o soi razist, al diseve porconant. A mi doi neris mi van plui che ben!

Un al è chel là jù insom - e al segnave bande dal cjampanili, cul so dedut scalembri - e chel altri al è il gno purcit tal cjôt, che al mangje dut ce che mi vanze e nol domande mai nuie. Lôr, al diseve, lôr a son doi neris che o sopuarti benissim, si che duncje, no soi razist!

E tu podevis ben lâ a disi, a Tavo, che se le ves vude cetant cui neris, nol varès di sigure dât ogni sere un ûf dût al senegalês che al vendeve acendins e cjalçuts. (*Ma se al à fam...*) e nol varès dât doi euro al marochin tal parcament dal supermarcjât (*Eh, ma se mi puarte la spese...*) e nol varès nancje poiât un biel piç de sô pension al missionari che al jere tornât dal Brasîl (*in Brasîl a son ancje blancs, eh*), par no fevelâ dal vê insegnât i motos de briscule al afgan "richiedente asilo" (*e ma mi deve un fastidi no rivâ mai a fâ il quart par fâ un ragjo!*). Insome... o vês capît.

Po dopo, une dì, dut chest cuintrisens *sui doi neris* al mudà intun lamp. Al fo cuant che Don Ciso, dopo un pâr di... *neris* (e... no, su chei o savìn che nol è razist nissun) lu visà che nancje Gjesù Crist, stant che Betlem nol è di sigure sot dal Comun di Tarvis, di piel nol veve di sei cetant clare.

No lu vessie mai dit!

Di chê dì, di neris che i levin ben a Tavo, al restà dome un. E no di sigure chel sot dal cjampanili!

di Rafaêl Serafin

#974